

REGULAMENTO DE RÉXIME INTERIOR DA SECCIÓN DE PSICOLOXÍA E SAÚDE

Introdución.

É finalidade deste Regulamento de Réxime Interior da Sección de Psicoloxía e Saúde do Colexio Oficial de Psicoloxía de Galicia ordenar o funcionamento organizativo da mesma.

Ten a súa referencia interpretativa nos *Estatutos e no Regulamento Marco das Seccións Profesionais do Colexio Oficial de Psicoloxía de Galicia*.

Artigo 1.- O nome da Sección é: Sección de Psicoloxía e Saúde do Colexio Oficial de Psicoloxía de Galicia.

Artigo 2.- A Sección ten como fins e funcións as expresadas nos artigos 5 e 6 do Regulamento Marco e concretará as mesmas desenvolvendo as seguintes actividades:

- 2.1. Organización anual das Xornadas Galegas de Psicoloxía e Saúde que considerarán no seu programa tanto cuestións científicas como profesionais, e das que se responsabilizará un Comité Organizador e un Comité Científico que será nomeado a proposta da Xunta Directiva.
- 2.2. Edición dunha publicación periódica que constitúa o instrumento regular de comunicación e divulgación científica e profesional da Sección, elixindo para tal fin un Consello de Redacción e un/unha Director/a nomeado/a pola Asemblea de Socios/as a proposta da Xunta Directiva.
- 2.3. Difusión regular da información de interese relacionada co ámbito da Sección e con destino a todos/as os/as colexiados/as a través de órganos xerais de información do Colexio, designado a Xunta Directiva a un corresponsal para tal fin.
- 2.4. Organización, por iniciativa propia ou conxuntamente con outras entidades e institucións, de sistemas de apoio á formación, investigación e difusión científicas na Psicoloxía Clínica procurando a creación de becas, axudas e premios.
- 2.5. Apoio á creación entre os membros da Sección de grupos de traballo para a investigación, a formación e intercambio científico.
- 2.6. Seguimento, avaliación e acreditación dos Programas de Formación en Psicoloxía vinculados á Saúde, e elaboración e presentación de propostas para a súa mellora.
- 2.7. Seguimento da situación dos dispositivos sanitarios asistenciais e docentes nos que desenvolven o seu facer os/as profesionais da

Psicoloxía, e realización de propostas e valoracións necesarias para o mellor cumprimento dos seus obxectivos.

- 2.8. Atención á calidade e rigor da práctica profesional dos/as psicólogos/as no ámbito sanitario promovendo o desenvolvemento das accións de tipo organizativo e formativo necesarias para o seu incremento.
- 2.9. Difusión do Código Deontolóxico e progreso no seu desenvolvemento estudando e propoñendo as incorporacións propias que a práctica actual da Psicoloxía Sanitaria necesita.
- 2.10. Estudo dos criterios e requisitos de cualificación recomendables para o desempeño profesional no campo sanitario da Psicoloxía.
- 2.11. Representación do Colexio naquelas instancias públicas ou privadas que teñan como obxecto principal da súa actividade a saúde e/ou a Sanidade.
- 2.12. Seguimento da evolución do colectivo profesional da Psicoloxía e mantemento actualizado da información sobre o mesmo.
- 2.13. Creación dos grupos de traballo necesarios para o mellor cumprimento dos fins da Sección.
- 2.14. Cooperación con outras asociacións científicas e/ou profesionais relacionadas co obxecto e os fins da Sección para a consecución de obxectivos de interese común.
- 2.15. Realización de propostas e informes á Xunta de Goberno para o desenvolvemento das accións colexiais necesarias para o mellor cumprimento dos fins da Sección.
- 2.16. Establecemento de relacións con asociacións de ámbitos xeográficos e culturais de interese preferente (Europa e Latinoamérica) para facilitar o mutuo intercambio e a cooperación.
- 2.17. Estudo, informe e proposta das normas de orde legal que afecten ao desenvolvemento da Psicoloxía no campo sanitario.
- 2.18. Administración dos recursos dos que en dereito dispoña e goberno de actividade que lle é propia.
- 2.19. Desenvolvemento da División de Psicoloxía Clínica do Fondo Documental do Colexio Oficial de Psicoloxía de Galicia.

Artigo 3.- Xunto ao previsto nos artigos 15, 16, 17, 18 e 19 do Regulamento Marco, a Sección rexerese tamén polas seguintes concrecións das normas citadas:

Páx. 3 de 7

REGULAMENTO DE RÉXIME INTERIOR SECCIÓN PSICOLOXÍA E SAÚDE

(Aprobado en Xunta Xeral do COPG de 21/12/2001 e modificado en Xunta Xeral do COPG de 02/12/2008, modificado en Asemblea Xeral de Colexiados/as do COPG de 01/12/2009 e modificado en Asemblea Xeral de Colexiados/as do COPG de 10/12/2013)

- 3.1. Para ser membro da Sección acreditarase o desempeño profesional actual na Psicoloxía Clínica xa sexa na súa dimensión docente, investigadora ou clínico-aplicada, ou ben a formación especializada dalgún dos seguintes criterios:
- a. Que sexan xa membros da Sección de Psicoloxía Clínica con anterioridade á presente modificación.
 - b. Que teñan acadado o título de Máster en Psicoloxía Xeral Sanitaria.
 - c. Que teñan acadado o título de especialista en Psicoloxía Clínica.
 - d. Que cumpran os requisitos para acadar a súa inscrición no rexistro de centros, servizos e establecementos sanitarios, de acordo coa normativa vixente.
 - e. Que estean realizando a formación como psicólogos/as internos/as residentes na especialidade de Psicoloxía Clínica.
 - f. Que realicen actividade de formación e/ou investigadora dentro do campo da Psicoloxía Clínica no ámbito docente de pregrao ou posgrao, previa valoración e aprobación dos seus méritos por parte da Xunta Directiva da Sección.
- 3.2. A solicitude de ingreso realizaraa o/a colexiado/a cumprimentando a solicitude provista ao efecto á que engadirá a documentación certificativa da condición provista no artigo anterior.

Artigo 4.- Os órganos de goberno da Sección, ademais do xa previsto nos artigos 21, 22, 23, 24, 25, 26, 27 e 28 do Regulamento Marco, rexeranse polas seguintes normas:

- 4.1. A Asemblea de Socios/as da Sección reunirase previa convocatoria persoal aos membros da Sección, cun mes de antelación á súa realización e con expresión da orde do día e hora de primeira e segunda convocatorias, no marco das Xornadas Anuais previstas no artigo 2.1 do presente Regulamento. Aprobará, cando proceda, e a proposta da Xunta Directiva, o nomeamento do/a Director/a e Consello de Redacción da publicación periódica da Sección.
- 4.2. A Xunta Directiva da Sección estará constituída polos cargos previstos no artigo 27 do Regulamento Marco e entre tres e cinco vogais.
- 4.3. A elección da Xunta Directiva realizarase, cada catro anos a través de votación directa e secreta de listas pechadas con expresión de cargos, que serán presentadas como candidaturas á Xunta Directiva con 45 días de antelación como mínimo ao día de eleccións.
- 4.4. As eleccións á Xunta Directiva serán convocadas a través de comunicación persoal a todos os membros da Sección con tres meses de

antelación ao día da súa realización, que o será no marco da Asemblea de Socios/as Anual correspondente. A convocatoria de eleccións incluírá as normas de votación, o calendario electoral, os requisitos necesarios para concorrer como candidatura e os recursos que caberán ao proceso e prazos dos mesmos.

- 4.5. Un mes antes das eleccións a Xunta Directiva fará chegar aos membros da Sección a información sobre as candidaturas presentadas incluíndo, se fora o caso, as súas propostas de programas para a Sección.
- 4.6. A votación realizarase coas papeletas provistas ao efecto e non se admitirán como válidas aquelas que non sexan as oficiais ou estas últimas cando sufriran modificacións.
- 4.7. A Mesa Electoral será elixida pola Asemblea de Socios/as da Sección e formarana Presidente/a, Secretario/a e dous Vogais coas funcións que lle son propias. Tamén poderán participar nela un/unha interventor/a por cada candidatura con voz e sen voto.
- 4.8. O/A Secretario/a co visto bo do/a Presidente/a levantará acta da elección na que constará a composición da Mesa, os votantes que exerceron o dereito, os votos recibidos por cada candidatura, os nulos e os votos en branco, e as incidencias e reclamacións.
- 4.9. Será elixida como nova Xunta Directiva a candidatura máis votada que tomará posesión nun prazo máximo de dous meses. No caso de que só haxa unha única candidatura a mesma será proclamada polo Presidente da Comisión Electoral ao finalizar o proceso electoral.
- 4.10. A Xunta Directiva xuntarase por convocatoria do/a seu/súa Presidente/a, por acordo unánime dos seus integrantes, ou a petición dun tercio dos mesmos. Será convocada polo/a Presidente con 48 horas de antelación á súa realización como mínimo, especificando a orde do día, lugar de realización e hora da mesma.

Os seus acordos requirirán para ser válidos o voto favorable da metade máis un dos seus membros.
- 4.11. A Xunta Directiva poderá constituír unha Comisión Permanente formada polo/a Presidente/a, o/a Secretario/a e o/a Tesoureiro/a para a adopción de acordos e medidas urxentes cando así sexa necesario e que deberán ser referendadas pola Xunta Directiva nun prazo máximo de sete días.

Artigo 5.- Ademais do xa previsto no Regulamento Marco nos seus artigos 30, 31, 32, 33, 34 e 35 a Sección ordenará o seu réxime económico atendendo ás seguintes especificacións:

- 5.1. Anualmente a Xunta Directiva presentará para a súa aprobación pola Asemblea de Socios/as da Sección o Balance Económico do Exercicio Anterior e o Orzamento de ingresos e gastos para o seguinte.
- 5.2. A Sección establece unha cota para os seus asociados e asociadas de 45 euros anuais que será revisada pola Asemblea de Socios/as da Sección cando a mesma o estime procedente. A cota será realizada nun único pagamento no primeiro semestre do ano natural.
- 5.3. Ademais do que dispón o réxime contable xeral do Colexio, a Sección levará unha contabilidade diferenciada accesible para calquera asociado/a cando así o solicite a Presidencia da mesma.
- 5.4. A Sección establecerá o réxime de compensacións dos gastos que aos/ás asociados/as lle xenere o desenvolvemento de actividades propias da Sección de interese xeral e para as que previamente fora elixido. As compensacións non poderán superar a contía do provisto no Réxime Xeral do Colexio e non poderán ter finalidade remunerativa.
- 5.5. A Sección establecerá o réxime da remuneración de actividades docentes ou de calquera outros de carácter laboral desenvolvidas para o cumprimento dos seus fins.

Artigo 6.- Os grupos de traballo previstos no artigo 2.5 e 2.13 deste Regulamento rexeranse para a súa constitución polo provisto a continuación:

- 6.1. Os promotores dirixirán a proposta á Xunta Directiva na que se especificarán os obxectivos para os cales se constitúe e as condicións de participación dos/as asociados/as nos mesmos. A Xunta Directiva contrastada a súa adecuación aos fins xerais da Sección adoptará a decisión de aprobación ou denegación da súa constitución como grupo oficial de traballo de Sección. De ser aprobado preverá as medidas de apoio oportunas para o desempeño da súa actividade.
- 6.2. A Xunta Directiva informará anualmente á Asemblea de Socios/as das decisións de aprobación ou denegación da creación de grupos de traballo e da Memoria de actividades destes.
- 6.3. A Xunta Directiva poderá dar por finalizada a actividade dun grupo de traballo por acadar os seus obxectivos, por non ter conseguido avances nun tempo axeitado, ou por non axustarse a súa actividade as condicións iniciais de constitución. Esta decisión terá que ser razoada e informarse a Asemblea de Socios/as.

Disposición adicional:

Manterase a continuidade na numeración das Xornadas e do Anuario da Sección.

Disposición final:

Corresponde á Asemblea Xeral de Colexiados/as do Colexio Oficial de Psicoloxía de Galicia a aprobación, interpretación e modificacións deste Regulamento; e á Xunta de Goberno promover a súa aprobación e modificacións cando proceda.